

26. september 2016

Kalaallit Nunaanni pinerluttulerineq pillugu inatsisip aamma Kalaallit Nunaanni eqqartuussisarneq pillugu inatsisip allanngortinneqarnissaanut missingiummut Namminersorlutik Oqartussat tapersersuinissaat pillugu Inatsisartut aalajangiiffigisassaattut siunnersuut (Oqarasuaatikkut nalunaaruteqartarneq, Kalaallit Nunaanni pinerluuteqarsimasunut inissiisarfinni pissaanermik atuineq, kiisalu palleeqqusinnginneq, sumiiffimmeeqqusinnginneq peersitaanerlu il. il) aamma palleeqqusinnginneq, sumiiffimmeeqqusinnginneq peersitaanerlu pillugit inatsisip Kalaallit Nunaannut atuutilernissaa pillugu peqqussut aamma pinerlunnernik eqqugaasimasunut naalagaaffimmit taartisiaqarnissaq pillugu inatsisip allanngortinneqarnera.

(Ilaqutariinnermut, Naligiisitaanermut, Isumaginninnermut Inatsisinillu atuutitsinnermut Naalakkersuisoq)

Aalajangiiffigisassatut siunnersuut manna pillugu Siumumiit imaattumik oqaaseqaateqassaagut.

Kalaallit Nunaanni pinerluttulerineq pillugu inatsisimmi kiisalu Kalaallit Nunaanni eqqartuussisarneq pillugu inatsimmi annikittualunnik isumalerujussuarnilli allannguuteqartitsinissat uani aalajangiiffigisassatut siunnersuummi siunertarineqarmata Siumumiit maluginiarparput, taakkualu allannguutissatut atortuulersussatullu siunnersuutit Siumumiit aamma taperseratsigik matumani oqaatigissallutigu.

Palleeqqusinnginneq, sumiiffimmeeqqusinnginneq peersitaanerlu pillugit inatsimmik nunatsinni atuutilersitsiniarneq Siumumiit taperserparput, tamanna innuttaasut kikkulluunniit inatsisitigut toqqissimasumillu inuunissaannut illersorneqarnerunissaannullu tunngassuteqarlunnarpoq. Inuit kiffaanngissuseqarlutik nammineersinnaassusaannut innarliinginnissamik erseqqissumik inatsisitigut illersugaaffeqarsinnaalernissaq aqqutissaavoq pitsaasoq. Tamannalu amigaataasimavoq namminerisamik malittarisassaqaarnissaq, qujanartumillu siunnersuut manna aqqutigalugu pitsaaliuineq aqqutissiuuttussanngussavarput.

Siunnersuummi matumani aamma eqqartuussisarnermut inatsimmi allanngortitsinissaq siunertaavoq, tassani inuk suliamut aalajangersimasumut ilaalersoq nalunaaruteqariaaseq nutaaq atorlugu oqarasuaatikkut nalunaaruteqarfigineqarsinnaanngussammat. Tamanna eqqartuussiviit sulinerannut oqilisaataasussatut naatsorsuutigineqarmat Siumumiit ilalernartikkatsigu matumani aamma oqaatigissavarput. Taamaasilluni aamma eqqartuussivitsigut suliassat sukkanerusumik pilertornerusumillu ingerlasalernissaannik kinguneqartussanngornissaa Siumumiit takorloorsinnaagatsigu ilalernartipparput.

Naggataatigullu aalajangiiffigisassatut siunnersuutip massumap aamma anguniarpaa isertitsivinni pissaanermik atueriaatsimi qasilitsumik seqqartaatinik eqqornaveeqqutinillu atuisinnaanngorsinnaaneq, taakkualu periarfissiisutiginarneqarneri Siumumiit aamma iluarisimaarnartikkatsigik ilanngullu oqaatigissavarput, tassami isertitsivimmiitat inunnut allanut imminullu ajoqusiiniarsarisut taamaasillutik pissaanermik atueriaatsit taakkua atorlugit isertitsivinni sulisut iluaquserneqarsinnaassammata.

Siumumiit taamatut oqaaseqaateqarluta aalajangiiffigisassatut siunnersuut manna Inatsisinut ataatsimiititalimi suliarineqartussanngorlugu innersuupparput.

Anders Olsen
Siumut